

菩薩投身飼餓虎起塔因緣經

北涼高昌沙門法盛譯

如是我聞一時昔佛遊乾陀越國毗沙門波羅大城於北山巖蔭下爲國王大臣人民及天龍八部人非人等說法教化度人無數教化垂畢佛便微笑口出香光光有九色遍照諸國香熏亦爾時諸大衆覩光聞香皆大歡喜時光明還繞佛七匝復從口入爾時阿難整衣服長跪叉手白佛言今者世尊現奇瑞相必有因緣多所饒益衆生蒙祐惟願天尊說其因緣佛告阿難如汝所說諸佛密口凡所現相皆有因緣汝欲聞乎阿難曰唯天中天佛告阿難過去九劫時世無佛有一大國名乾陀摩提王名曰乾陀尸利夫人名曰釵摩目佉太子名曰栴檀摩提其國廣博豐樂

饒人人壽千五百歲太子福德天下太平無偷劫賊人民和順不相尅伐太子慈仁聰明智慧貫練群籍及九十六種道術威儀靡不通達少小已來常好布施於身命財無所遺惜慈育衆生甚於赤子大悲普覆平等無二孝養父母禮儀備舉爾時父王爲太子去城不遠造立園觀其園縱廣面八由旬列種華果奇獸異鳥清淨嚴麗處處皆有流泉浴池池中常有優鉢羅華鉢頭摩華拘物頭華分陀利華及餘種種赤白蓮華孔雀翡翠鳩鵲鴛鴦遊戲其中清涼香潔微妙第一爾時太子與群臣百官及后妃嫔女導從前後詣園遊戲經一七日迴駕還宮爾時國界有貧窮孤獨老病百疾閭太子還悉來在道側張手向太子太子見已即以身瓔珞服飾及金錢

悲十

五

銀錢車乘象馬悉用布施及至城門無復餘物貧者猶多恨不周足太子還宮念諸貧人憂不能食王問太子爲恨何也太子答曰近出遊觀見諸貧人來在道側求索所乏即以身所有施之猶不周足故自愁耳今欲從大王乞中藏財物周給天下不審大王賜所願不王言國家庫藏防備緩急不宜私用於是太子所願不果愁倍於前太子傍臣名曰閻耶見太子不食悲感懊惱長跪叉手白太子言臣有金錢十千奉上大天隨意所用願莫憂貧飲食如先錢若不足臣當賣身供奉大天於是閻耶即以金錢十千奉上太子太子使人持錢出城布施盡十千數猶不得周還白太子金錢已盡貧者尚多於是太子即使傍臣料檢私藏復得金錢十千布施貧者猶

不充足太子自念夫人之苦皆由貧窮求不得苦今當自賣所愛之身救彼人苦令得安樂思惟是已却珍寶衣著凡故服默出宮城投適他國名裴提舍自銜賣身與一婆羅門得千金錢即以此錢施諸貧人時婆羅門使奴將車入山斫樵於市賣之經於多時後復取薪乃於山中得牛頭栴檀一段重一百斤時彼國王本有癩病醫方呪術不能令差王便怒曰用醫何爲夫人百病皆有對治之藥而我此病何獨不蒙令收諸醫於市斬刑時有一醫叩頭白王言今王此病對治之藥世間難有雖有其名未曾得見王曰藥名何等答曰牛頭栴檀王曰夫人罪福業行不同自有福人設有此藥即教宣令天下誰有此藥當分半國從其市之時婆羅門喚奴語曰你

從來賣薪雖獲微直不如今者富貴之利國王有病今以半國市牛頭栴檀汝今可賣此栴檀往奉大王必得如意吾當與汝共同此樂也時奴便持牛頭栴檀奉上國王王得之已磨以塗身癩病即愈王大歡喜舉國臣民各蒙慶賴即召群臣大設施會放赦囚徒布施貧乏上下和樂王使大臣破半宮殿及所領國民金銀珍寶錢財穀帛奴婢車乘象馬牛羊悉皆分半莊嚴寶車百乘馬騎千疋作倡妓樂香華幢幡百味飲食迎奴還國即便請之共坐寶牀作倡妓樂飲食娛樂王問奴曰見卿福德威相有殊於世何緣處賤願聞其志奴曰甚善卿欲聞者今當說之如卿所疑吾本非奴卿頗曾聞乾陀摩提國王有太子名栴檀摩提好布施不答曰我數聞名但

未曾見耳曰吾便是也其王聞已倍更敬重曰何緣致是太子曰吾好布施盡國財物不足周用窮者猶多本願不遂是以捨國自賣身耳王曰夫人宿行隨業受報修善則樂行惡則苦非卿所爲非父母與何乃虧國大望處險涉難如此之事天下少有必有異見願聞其志太子答曰吾本發意誓度群生行諸波羅蜜志求菩提王曰善哉甚大隨喜太子語王今以國還卿唯求一願當不見違答曰所願何等太子曰欲得中藏錢財之物以周給天下貧窮孤老羸百疾恣意布施滿五十日其中功德與卿共之王曰甚善錢財之物隨卿施用所賞半國是卿功分吾不敢受太子曰善卿以財施我我以國奉卿我好布施卿之樂國人物殊性志欲不同王曰此行

弘深非吾所及卿得道時願見濟度太子即遣使宣告諸國若有貧窮孤老尪羸之者悉令來會爾時太子使人開諸庫藏運輦財物於平坦地布施貧人滿五十日貧者得富莫不歡喜爾時太子委國去後群臣驚怖啼哭白王昨夜忽亡太子不知所在王聞是語從牀而落迷不識人夫人宮中后妃嫔女及諸臣佐莫不驚怪悲感懊惱舉聲號叫奔出四向追覓太子時王夫人懼失太子忽忽如狂即與后妃褰裳被髮奔走出城東西馳逐尋覓太子王恐夫人念子懊惱或能致命即與群臣嚴駕出城追覓夫人并太子消息去國十里於空澤草中乃見夫人從數宮女椎胸涕泣頭亂目腫披擘草叢求覓太子其王見已更增悲結前捉夫人手涕泣交流諫夫人

曰吾子福德慈孝布施與物無怨盡以財物布施天下猶不周足常懷悔恨無物施用子今密去必投他國求財布施或自賣身周給貧苦且共還宮勿大憂愁吾今當遣使到諸國中訪問消息必得子還夫人罵曰由王慳貪護惜錢財不念我子今寧可以錢財爲子身不王曰吾失在先今悔何及且共還宮保不失子今當躬身四出求索要當子還夫人垂淚曰今失我子用生何爲寧死於此不空還也我觀子身不知飢渴雖遭大苦不以爲患今還守宮何所怙恃於是太子后妃被髮亂頭號天叩地四望顧視不見太子號天叩頭飲淚而言天地日月父母靈神若我有罪今悉懺悔願與我大天早得相見於是國王強牽夫人及太子后妃車載還宮太子爾時

遙在他國兩目手足三返睜動心中愁怖似
有忘失即辭彼王還歸本國王令傍臣莊嚴
寶車百乘馬騎千匹金錢十千銀錢十萬王
有五百大臣人各金錢十千銀錢十萬以贈
太子王與群臣十十萬人送太子到國界頭
施設大會歡喜相謝於是別去太子惟曰從
小以來足不妄動目不妄睨吾前出國不辭
父母必是父母及國人民恐失我故憂愁苦
惱今當速去令知消息又復惟曰道途曠遠
不可卒到恐我父母哀念情重或喪身命當
作何方令得消息速達時有鳥悲十善能人語
白太子言仁德至重恩潤普及憂何不辦欲
何所爲吾當助之太子答曰欲託一事願見
不違鳥曰奉命太子曰煩卿送書與我父母
鳥曰宜急今正是時太子作書以授與鳥鳥

口銜書飛到本國以書置王前王披書讀知
太子消息甚大歡喜即起入宮語夫人曰如
吾語卿知不失子不過數日必得見子夫人
聞已如死還蘇拍手稱善曰令一切天下安
隱快樂所願皆得壽命無量爾時國中群臣
豪族男女大小聞太子還皆稱萬歲王即與
群臣數千萬人嚴駕導從出迎太子道路相
逢太子見父即下寶車前接足禮啓白父王
自道不孝枉屈尊神驚動國界幸蒙原恕王
曰甚善父子相見悲喜交集迴駕還宮舉國
民庶莫不歡喜遠方諸國貧窮乞人聞太子
還多得錢財皆從遠來詣太子乞太子使人
擔輦錢物於道路頭平坦空地布施貧人一
年之中日日不絕四方來者皆得如意爾時
父王與諸大臣語太子曰從今已往國藏珍

寶隨所須用莫自疑難夫施之德遠近所重
怨敵惡人聞太子功德者自然修善爾時有
五通神仙道士名曰勇猛與五百弟子在此
山上大巖窟中修禪行道志求菩提欲度衆
苦教化天下皆令修善爾時太子栴檀摩提
賣持種種百味飲食上山供養諸仙人於
時仙師呪願太子因爲說法太子心喜志樂
無爲不欲還國顧惟宮室生地獄想妻子眷
屬生桎械想觀五欲樂爲地獄想思惟是已
即解瓔珞嚴身上服及車馬人從悉付傍臣
遣令還國於是太子被鹿皮衣留住山中從
師學道鑽尋道術時太子傍臣還國白王太
子上山供養仙人留彼學道不肯還宮經書
呪術悉令通達自要當還王曰一何苦哉世
人得子以致歡樂憑賴老時益國除患吾得

此子常懷憂苦不欲富貴不親眷屬此之惱
子何道之有即召群臣共論此事諸臣啓曰
太子好道不貪世榮志樂無爲旣不還國非
可如何王宜遣使審定其意必不還者當量
其宜王即遣信往問太子吾今待子如渴思
飲停留山中不還何意今夫人后妃揮涕望
塗悲號懊惱不自任處夫子道安親不宜苦
逆隨使必還使者受命旨白如是太子答曰
萬物無常形不久存室家歡娛離別則苦性
命由天不得自在無常對至雖有父子不得
相救今求無爲欲度衆苦得道之日先度父
母今此處不遠亦當時往奉觀目下此志已
定王宜更計續立國嗣還信白王具說上事
王即召集群臣更立太子時王夫人與太子
后妃嫫女營從賣持太子衣服嚴身之具及

種種甘美飲食香華妓樂導從前後上山到太子處飯諸仙衆因迎太子夫人曰夫種穀防飢掘井待渴立郭防賊養子侍老汝今不還吾命不全太子長跪白夫人曰捨家處山改形易服如唾出口不中食用閑居道士於國無施理分已定非可改移寧碎身於此終不還也願母時還尋爾修觀於是夫人及太子后妃見太子志意堅固無有還意悲哭懊惱隨路而歸於時國王惟望夫人得太子還與諸羣臣出城迎待唯見夫人與太子后妃被髮亂頭椎胸號咷隨路空歸王益不樂羣臣萬衆莫不涕淚迴駕還宮於是國王諫謝夫人及太子妻吾子好道世間難有慈育普濟莫不蒙恩此國之寶非凡器也今樂山居以修其志但令安隱時復相見今且與子相

去不遠餉致飲食消息往來可以自慰於時夫人得王諫已憂憤小歇時時遣人賫持飲食及諸甘果種種美膳往到山中供養太子如是多年太子亦時時來下問訊父母乃復還山修道其上下有絕崖深谷底有一虎新生七子時天大雪虎母抱子已經三日不得求食懼子凍死守餓護子雪落不息母子飢困喪命不久虎母既爲飢火所逼還欲噉子時山諸仙道士見此事已更相勸曰誰能捨身救濟衆生今正是時太子聞已唱曰善哉吾願果矣往到崖頭下向望視見虎母抱子爲雪所覆生大悲心立住山頭寂然入定即得清淨無生法忍觀見過去無數劫事未來亦爾即還白師及五百同學吾今捨身願各隨喜師曰卿學道日淺知見未廣何忽自

悲十

十二

天捨所愛身太子答曰吾昔有願應捨千身
前已曾捨九百九十九身今日所捨足滿一
千身是故捨耳願師隨喜師曰卿志願高妙
無能及者必先得道勿復見遺太子辭師而
去於是大師與五百神仙道士涕泣滿目送
太子到山崖頭時有富蘭長者將從男女五
百餘人賫持飲食上山供養見太子捨身悲
感啼哭而隨太子至山崖頭於是太子在衆
人前發大誓願我今捨身救衆生命所有功
德速成菩提得金剛身常樂我淨無爲法身
未度者今度未解者今解未安者今安我今
此身無常苦惱衆毒所集此身不淨九孔盈
流四大毒蛇之所蜇螫五拔刀賊追逐傷割
如此身者爲無返復甘膳美味及五欲樂供
養此身命終之後無善報恩反墮地獄受無

量苦夫人身者唯應令苦不得與樂太子種
種訶責其身諸惡過咎已又發誓言今我以
血肉救彼餓虎餘舍利骨我父母後時必爲
起塔令一切衆生身諸病苦宿罪因緣湯藥
針灸不得差者來我塔處志心供養隨病輕
重不過百日必得除愈若實不虛者諸天降
雨香華諸天應聲即雨曼陀羅華地皆震動
太子即解鹿皮之衣以纏頭目合手投身虎
前於是母虎得食菩薩肉母子俱活時崖頭
諸人下向望視見太子爲虎所噉骨肉狼藉
悲號大叫聲動山中或有椎胸自撲宛轉卧
地或有禪思或有叩頭懺悔太子爾時首陀
會諸天及天帝釋四天王等日月諸天數千
萬衆皆發無上菩提之心作倡妓樂燒香散
華曼陀羅華供養太子而唱是言善哉摩訶

薩埵從是不久當坐道場如是三唱已各還
天宮五百仙人皆發無上正真道意神仙大
師得無生忍王及夫人明旦遣使賫持飲食
上山餉太子到住常石室唯見卧具鹿皮衣
傘蓋鉢盂錫杖水瓶澡罐悉在室中不見太
子周遍問人無有應者唯見仙人十五五
相向涕泣到大師所唯見仙師以手拄頰涕
淚滿目呻吟而坐周徧推問無肯應對使者
怖懼即以飲食施諸仙士走還白夫人具說
上事夫人曰不見我子見諸仙不答曰但見
仙士十五五相向涕泣夫人曰禍哉吾子
死矣椎胸大叫奔走詣王王聞是已從牀而
落迷不知人羣臣萬眾來集王側叩頭諫曰
太子在山未審虛實何爲哀慟願王小息於
是王及夫人后妃嫔女臣佐吏民褰裳徒跣

奔走上山爾時長者富蘭亦逆來告王曰太
子昨日投身巖下以肉飼虎今餘骸骨狼藉
在地於是長者即引導王到太子屍處王及
夫人后妃嫔女羣臣吏民舉聲悲哭震動山
谷王與夫人伏太子屍上心肝斷絕悶不識
人妃前扶頭理太子髮心肝摧碎啼哭聲噎
曰一何薄命生亡我尊今日永絕不復得見
寧令我身碎如塵粉不令我夫奄忽如今太
子已死我用活爲時群臣白王太子布施誓
度群生無常殺鬼所侵奪也未及臭爛宜設
供養即收骸骨出山谷口於平坦地積栴檀
香及種種香木諸香酥油繒蓋幢幡以用闍
維太子收取舍利以寶器盛之即於其中起
七寶塔種種寶物而莊校之其塔四面縱廣
十里列種種華果流泉浴池端嚴淨潔王常

